

Bosniako agintariek miliar bat dolar ostu dituztela ukatu du Izetbegovicek

Suitzak jada iragarri du herrialde horri ematen dion laguntza gutxituko duela

Agentziak / Sarajevo-Berna

Bosniako buruzagi musulmanek, serbiarrek eta kroaziarrek diru publiko-ko edo nazioarteko laguntzako miliar bat dolar beraientzat gorde

dituztela esatea «gezur» hutsa da, atzo Alija Izetbegovic Lehendakari-tzako kide musulmanak adierazi zuenez. *New York Times* egunkariak egin du salaketa, Nazio Batuetako Bosniarako ordezkariaren ikerketa

batean oinarrituta. Salaketa egiaztatzen bada, kalte handia egin diezaioke Bosniari, gaur egun nazioarteko laguntza ezinbestekoa baitu aurrera egiteko. Dagoeneko Suitzak esan du diru gutxiago emango diola.

BOSNIAKO agintarien artean Izetbegovic izan da lehena *New York Times* egunkariaren informazioa gezurtatzen. «Salatutakoa gezurra da; Bosniako Gobernuari kalte egiteko zabaldu dute berria, eta herrialde adiskideek gure herriari finantza eta militar laguntza eman ez diezaioten». Izetbegovicen iritziarekin bat egin zuen Haris Silajdzic lehen ministro musulmanak. «Ikerketak kalte handia egin dio Bosnia-Herzegovinari, une honetan ahalegintzen ari baikara nazioarteko finantza erakundeen konfiantza eta atzerriko inbertsoreena lortzen», esan zuen.

New York Times-en arabera, Nazio Batuetako Goi Komisariatuko iruzurraren aurkako taldeak amaituta du ustelkeriari buruzko txostena, baina publizitaterik ez dio eman nahi, atzerriko laguntzei oztupoak ez jartzeko.

Bosniako Goi Komisariatuko buru berria Wolfgang Petritsch austriarra da; lehen Carlos Westendorp espainiarra zegoen. Petritschek jada ohar bat egin die Izetbegovici eta Bosniako Lehendakari-tzako kide serbiarrari eta kroaziarrari. Arazoa seriozki tratatzeko eskatu die, gaur egun Bosniak nazioarteko laguntza behar duelako. Petritschek ez zituen egunkariak zabalduetako datuak baieztatu nahi izan, baina ustelkeriak



Bosniako Lehendakari-tzako hiru kideak, kargua hartu zutenean, iazko urrian: Ante Jelavic kroaziarra, Zivko Radisic serbiarra eta Alija Izetbegovic musulmana.

biziki kezkatzen duela argi utzi zuen.

New York Times-ek dioenez, Goi Komisariatuko iruzurraren aurkako taldea 220 kasu ari da aztertzen. Jasotako dirua errepideak konpontzeko, eraikinak eta eskolak egiteko eta udal zerbitzuetarako zen, baina, uste denez, hiru etnietako zenbait burukideren poltsikoetan bukatu zuen.

Desbideratutako diru gehiena bertakoen zergeta-

koa den arren, nazioarteko laguntzaren zati bat ere bada-go. 1995ean gerra amaitu zenetik, Bosniak 5,1 miliar dolarreko nazioarteko laguntza eskuratu du.

Suitzak laguntza gutxitu nahi du

Suitzak dagoeneko azaldu du Bosniari diru-laguntza gutxitzeko asmoa duela. Suitzak emandako laguntzatik, 1,5

milioi libera suitzar (910.000 euro) BH Bank bankuan dau-de, zein porrot egiteko zorian dagoen. Banku horretan jarritako 20 milioi dolar galdu dira orain arte, likidezia arazoak dituelako.

Bernako Gobernua saiatu da diru hori berreskuratzen, baina orain arteko saioek huts egin dute. Diru hori berriz itzuli ezean edo Bosnian bertan erabiltzen ez bada, laguntza murriztu egingo du

Sinn Fein bake negoziatioetatik kanpo nahi duela esan dio UUPk Mowlami

■ Datorren astean erabaki behar du gobernu britainiarrak IRAren su-etanak balio duenetz

Erredakzioa / Donostia

UUP ULSTERKO ALDERDI UNIONISTAKO buruki-deak Mo Mowlam Ipar Irlandarako ministro britainiarrarekin elkarrizketatu ziren atzo Belfasten. Elkarriketa horretan, Sinn Fein bake negoziatioetatik kanpo uzteko eskatu zituen Mowlami buruzagi unionistek.

UUPren arabera, Sinn Feinek ez du bete Ostiral Santuko bake akordioa, hari lotutako talde armatuak su-etena bortxatu duelako. Unionisten eta Ipar Irlandako RUC Poliziaren arabera, IRAk zenbait arma eraman nahi izan zituen Estatu Batuetatik Ipar Irlandara eta gutxienez gazte baten hilketan zerikusia izan du.

Ekintza horietan ez duela parte hartu ziurtatu zuen iragan astean IRAk.

Sinn Fein: «Su-etena ez da hautsi»

Sinn Feinek, bere aldetik, esan du ez duela loturarik IRArekin eta, gainera, talde armatuak ez duela su-etena hautsi. «IRAren su-etena edo operazio militarren etena, nire iritziz, bere horretan segitzen du», adierazi zion herenegun Mowlami Martin McGuinness alderdi errepublikanoko bigarren buruzagiak.

Sinn Fein eta SDPL alderdi nazionalista nagusia haserre daude unionistekin, beraien ustez, bake prozesua blokeatzen dutelako. Uztailan, UUPk uko egin zion Ipar Irlandako gobernu autonomikoa osatzeari, aurretik IRAk armak utzi behar zituela argudiatzen zuelako. Eskaera hori, ordea, ez da Ostiral Santuko akordioan agertzen.

Bake negoziatioak irailaren 6an hasiko dira berriro. Aurretik, Londresek datorren astean erabakiko du IRAren su-etena oraindik indarrean dagoen eta, hortaz, Sinn Feinek negoziatio mahaian jarraitu ahal duen.

Errusiarrek arazoak dituzte gerrillariak garaitzeko

■ *Aspaldian wahhabiten esku zeuden bi herri bonbardatu dituzte, islamisten propaganda etetearren*

Erredakzioa / Donostia

AZKEN ofentsibaren atarian, gerrillari islamistak garaitzeko arazo handiak izaten ari dira Dagestanen soldadu errusiarrak. Atzo goizean, Tando herrixkan egindako erasoan —gerrillarien esku dago— zortzi soldadu errusiar hil zirela eta beste 20 zauritu zirela onartu zuen Dagestango Barne Ministerioak. Egun bakar batean

izandako galerarik handiena da. Errusiako iturrien arabera, dagoeneko 29 hil izan dituzte gerra honetan errusiarrek eta Dagestango Gobernu-ko tropek. Tsumada barrutian izandako borroketan bi polizia dagestandar hil ziren atzo.

Errusiarrek bezalaxe, gerrillariak propaganda handia egiten dute hildakoen kopuruarekin. Groznin, Txetxenian, zabalduetako prentsa

agirian, islamistek ziurtatu zuten Tandon 60 paraxutista hil zituztela. Gatazka hasi zenetik 30 hil baino gutxiago izan dituztela aitortu dute matxinatuek, baina Moskuk dio gutxienez 600 gerrillari hil dituela.

Borroka gehienak Botlikh eskualdean gertatu dira. Inguru hori eta Txetxenian lotzen dituen Kharamiko mendi gaina kontrolpean zutela ziurtatu zuen atzo Errusiako Barne

Ministerioak. Horrenbestez, islamistek zailagoa izango dute errefortzuak jasotzea.

Botlikhetik 60 bat kilometro, Errusiako hegazkin eta helikopteroek Karamakhi eta Txabanamakhi herrietako irratia eta telebistako hedagai-lua txikitu zuten. Aspaldian talde musulman wahhabitaren esku dauden bi herri horietatik islamisten aldeko informazio ugari bidaltzen zen Errusiara.